

華嚴經普賢行願品疏

唐麗賓國三藏般若奉詔譯

澄觀述疏

◎序分

如是我聞。

今初。即如是我聞。謂如是一部經義，我昔親從佛聞故。佛地論云。謂傳佛教者，言如是事，我昔曾聞。此明如是指前題目。我聞即是阿難自稱。顯非我說，亦非傳聞，令物信故。智度論中為六成就。此中具二。如

是二字，即信成就。論云，佛法大海，信為能入，智為能度。信者言是事如是。不信者言是事不如是。故肇公云，如是者信順之詞也。信則所言之理順。順則師資之道成。經無豐約，非信不階，故云如是。真諦三藏云。真不違俗，名之為如。俗順於真，稱之為是。真俗無二，故稱如是。此約二諦，敵對外道阿優二字。深有所以。謂外道經初，皆置阿優。阿之言無，優之言有。萬法雖眾，不出有無。此即外道斷常邪見。今云。如即真空。是即妙有。真非有外，故空而非斷。俗非空外，故有而非常。對破邪宗，以顯中道。三世諸佛，經首皆

安。故中論云，諸佛依二諦，為眾生說法。更有多釋，義如常說。言我聞者，即聞成就。將傳未聞。自明親聞。諸蘊假者，故稱為我。根塵發識，是以稱聞。聞雖是耳，以總統別，假稱我聞。從緣而聞，聞無聞矣。不聞聞者，方曰真聞。若依此經，傳法菩薩，以我無我不二之真我，用根境非一異之妙耳，聞無障礙法界之如是矣。

一時佛在室羅筏城，逝多林給孤獨園，大莊嚴重閣。

第二一時下，標主時處，有三成就。初一時者，時

成就也。時有二種。一者總時。二者別時。此經別謂始成正覺。涅槃別時二月十五日等。或約所表。或為顯明。故須別舉。言總時者，但云一時。說法時多，不能別舉。一言略周，故云一時。即法王啟運嘉會之時。亦可機教相稱，故曰一時。佛者，主成就也。梵云勃陀，此翻覺者。斯經梵本是婆伽婆。應具六義。是以舊經譯為世尊。言六義者。佛地論云。一自在義。永不繫屬諸煩惱故。二熾盛義。炎猛智火所燒煉故。三端嚴義。三十二相所莊嚴故。四名稱義。一切殊勝功德圓滿無不知故。五吉祥義。一切世間親近供養咸稱讚故。六尊貴

義。具諸功德，常起方便，利益世間，安樂一切，無懈廢故。今云佛者，但順諸經，六成就中，多言佛故。具有十義，如題中說。在室羅筏至莊嚴重閣，明處成就。此有三處。一者國城。具云室羅筏悉底，此云聞者。西域記云。昔有古老仙人，住於此處。後有少仙，名為聞者，於此稟學。老仙歿後，少仙於此建立城郭，故取其名。亦云聞物，以此城中多出賢智博達名聞之人物故。即中印度境。二逝多林給孤獨園，明精舍號也。在於城南三四里間。逝多梵音，華言戰勝，即太子之號。給孤獨者，梵云須達多。正翻賑濟無依，義云給孤獨耳。即

長者之稱。長者仁而聰慧，積而能散。拯乏濟貧，哀孤恤老。時美其德，故立斯稱。長者傾金買地，太子施樹，同成功業。二人式崇，共立伽藍之號。三大莊嚴重閣者，別明說法處也。量周法界，故云大也。及顯莊嚴，並如下說。若約所表。所證法界體無不周，故稱為大。德無不備，名曰莊嚴。依體起用，二智重成，故名樓閣。

△第三與菩薩下，輔翼圓滿，即眾成就。先辨意。後釋文。今初中，略開五門。第一集意。第二集因。第三辨

類。第四定數。第五權實。今初。來至佛所，有何意耶。有十義故。一為影響為主伴故。二為輔翼常隨從故。三為守護佛世尊故。四為莊嚴菩提場故。五為供養佛菩薩故。六為發起此法門故。七為聞法獲勝益故。八為表法顯深理故。九為順證說不虛故。十為翻顯法不共故。為斯多意，來至佛所，非唯證信。證信但是傳法意故。

第二集因。有何因緣，得至佛所。亦有十因。一曾與如來同集善故。二蒙佛四攝曾攝受故。三往在生死聞圓法故。四曾發大心護一切故。五往昔大願願事佛故。

六隨逐如來無厭足故。七樂聞正法心無倦故。八善能散滅我慢心故。九福智已淨身周徧故。十同一性海善根生故。此十因中，前四後二唯是集因，五六七八兼明集意。由願供佛，得在佛會，即是集因。乘願而來，便是集意。餘可思準。

第三辨類。即上集意，成十類眾。一影響眾。二常隨眾。三守護眾。四嚴會眾。五供養眾。六發起眾。七當機眾。八表法眾。九證法眾。十顯法眾。準前可知。

第四定數。稱法界眾，焉能數知。即文而言。此一經中，文有二會。末會之眾，隨其善友多少不同，數類

無量。本會之中，總唯四眾。一菩薩眾。二聲聞眾。三世主眾。此三舊眾。四新集眾。文在正宗。然此世主，即同初會三十九眾。文不具列，語意皆含。文云復與無量諸世主俱，明知具有。以初一會徧八會故。以皆不起菩提樹王而周徧故。故下文云，一一塵中，有大菩薩，坐蓮華座，成等正覺。即見初會，明其諸眾前後相通。則數同初會。餘如別明。

第五權實者。前十類眾，影響唯權，當機則實，餘通權實。並通地前及與地上。然影響眾，自有二類。一者果德。謂佛影響。則亦名為非權非實。二位極菩薩為

影響者，即皆是權。亦可皆權，海印現故。亦可俱實，實德攝故。不動此會徧法界故。難思議也。

第二釋文。三眾即為三別。第一菩薩眾。第二聲聞眾。第三世主眾。

與菩薩摩訶薩五千人俱。

今初中菩薩文分五別。一標類數。二標上首。三列別名。四結數讚勝。五歎其勝德。

今初。先辨類者。具云菩提薩埵摩訶薩埵。菩提云覺。薩埵云眾生。亦翻勇猛。有三義故，總立此名。一

菩提者所求佛果。薩埵者所化眾生。即是悲智所緣之境。從境立名，故名菩薩。二菩提者所求之果。薩埵即是能求之人。能所合目，故名菩薩。三薩埵既云勇猛。勇猛求大菩提，故名菩薩，亦能所合目。摩訶云大。略有四義。一者願大，求大菩提故。二者行大，二利成就故。三者時大，經於三大阿僧祇故。四者德大，具足一乘諸功德故。前二通地前。後二唯地上。有說地上方稱大者，約具四義。五千人者，列數也。舊經五百。今云五千。比餘八會，二俱少者，解行者多，證入希故。要云五者，表於五位同證入故。五位各十，一一十度，度

各攝十，故為五千。如是修因，證入果海。

普賢菩薩摩訶薩，文殊師利菩薩摩訶薩，而為上首。

第二普賢下，標上首。以二大聖助化主故。為表法故。至下當明。言普賢者。梵云三曼多，普也。跋陀羅，賢也。乃有多義。一體性周徧曰普。隨緣成德曰賢。此約自體。故理趣般若云，一切眾生皆如來藏，普賢菩薩自體徧故。又曲濟無遺曰普。鄰極亞聖曰賢。此約諸位普賢。以俱發普賢心，三賢十聖皆普賢故。又德周法界曰普。至順調善曰賢。此約當位普賢。普賢正是

等覺位故。又果無不窮曰普。不捨因門曰賢。此約佛後普賢。成佛之後，亦曰普賢。位中普賢，悲智雙運。佛後普賢，智海已滿。而運即智之悲，寂而常用，窮未來際，教化眾生。又一即一切曰普。一切即一曰賢。此約融攝。言文殊師利者。或云曼殊室利。文殊曰妙。室利為吉祥。古譯為德。合為妙德。亦云溥首。亦云濡首。亦云妙首。以室利言含多義故。以示居此土，生有十徵。來自他方，體含萬德。降魔制外，通辯難思。稱妙吉祥。亦稱妙德。又主於般若，了了見性，故稱妙德。又知佛境界故。凡所施為，無非吉祥。又一切諸佛，皆

悉從之發菩提心。常為一切諸佛之母。普為一切菩薩之師。身徧十方一切剎土。久成正覺，已號龍種尊王。現證菩提，是曰摩尼寶積。當成正覺，復稱普見如來。化滿塵方。德周法界。故稱妙德。是曰吉祥。三乘尊於定慧兩足，諸佛多有智慧神通二大弟子。一乘尊於理智融攝，故標尊於二聖，而為上首。

其名曰。智慧勝智菩薩。普賢勝智菩薩。無著勝智菩薩。華勝智菩薩。日勝智菩薩。月勝智菩薩。無垢勝智菩薩。金剛勝智菩薩。無塵勞勝智菩薩。毗盧遮那勝智菩薩。星宿幢菩

薩。須彌幢菩薩。寶勝幢菩薩。無礙幢菩薩。華幢菩薩。無
垢幢菩薩。日幢菩薩。妙幢菩薩。離塵幢菩薩。毗盧遮那幢
菩薩。地威德光菩薩。寶威德光菩薩。大威光菩薩。金剛智
光菩薩。無垢光菩薩。法日光菩薩。福山光菩薩。智燄光菩
薩。普賢吉祥光菩薩。普賢燄光菩薩。地藏菩薩。虛空藏菩
薩。蓮華藏菩薩。寶藏菩薩。日藏菩薩。淨德藏菩薩。法海
藏菩薩。毗盧遮那藏菩薩。臍藏菩薩。蓮華吉祥藏菩薩。妙
眼菩薩。清淨眼菩薩。無垢眼菩薩。無著眼菩薩。普見眼菩
薩。妙觀眼菩薩。青蓮華眼菩薩。金剛眼菩薩。寶眼菩薩。
虛空眼菩薩。普眼菩薩。

第三其名曰下，列別名。夫聖人無名，為物強名。得名千差，而多依德行。德行皆具，不可備舉。而隨宜別標，皆有深義。恐繁不釋。但舉總類，以彰表法。此中有十五位。總列一百五十二人。於中分二。初五十一人，通表住等五位。後百一菩薩，別表十地。前中分五。初十勝智，以表十住，住名解故。舊經所無。二十幢表向，行德高出故。三十光表行，智光照行故。行向前卻者，行願相扶，無前後故。四十藏表地，生成住持故。五十一眼表等覺，親照寂故。

天冠菩薩。徧照法界摩尼智冠菩薩。道場冠菩薩。光明徧照十方冠菩薩。諸佛所讚冠菩薩。超諸世間冠菩薩。光明普照冠菩薩。無能勝冠菩薩。持諸如來師子座冠菩薩。大光普照法界虛空冠菩薩。梵王髻菩薩。釋主髻菩薩。一切諸佛變化差別光明髻菩薩。真實菩提場髻菩薩。一切願海聲摩尼王髻菩薩。出生大捨諸佛圓光摩尼王髻菩薩。現等虛空界一切寶蓋摩尼王髻菩薩。現一切佛神通光幢網垂覆摩尼王髻菩薩。出一切佛大法輪聲髻菩薩。大福圓滿名字音聲髻菩薩。大燄光菩薩。無垢燄光菩薩。離垢威德燄光菩薩。寶燄光菩薩。星宿燄光菩薩。法燄光菩薩。寂燄光菩薩。日燄光菩薩。神

通燄光菩薩。天燄光菩薩。福聚菩薩。智聚菩薩。法聚菩薩。神通聚菩薩。光燄聚菩薩。華聚菩薩。菩提聚菩薩。梵聚菩薩。一切眾生光聚菩薩。摩尼寶聚菩薩。梵聲菩薩。大海聲菩薩。大地吼聲菩薩。世主聲菩薩。山王自在聲菩薩。徧滿一切法界聲菩薩。一切法海潮聲菩薩。摧破一切魔力聲菩薩。大悲雲雷教聲菩薩。速疾救護一切世間苦惱聲菩薩。法出生菩薩。勝出生菩薩。智出生菩薩。福德須彌出生菩薩。最勝功德寶王出生菩薩。名稱出生菩薩。普賢光出生菩薩。大悲出生菩薩。智聚出生菩薩。如來種性出生菩薩。光吉祥菩薩。最勝吉祥菩薩。正勇出生吉祥菩薩。毗盧遮那吉

祥菩薩。蓮華吉祥菩薩。月吉祥菩薩。虛空吉祥菩薩。寶吉祥菩薩。積吉祥菩薩。智慧吉祥菩薩。山自在王菩薩。法自在王菩薩。世自在王菩薩。梵自在王菩薩。數自在王菩薩。龍自在王菩薩。寂靜自在王菩薩。不動自在王菩薩。威力自在王菩薩。最勝自在王菩薩。最寂音菩薩。無等音菩薩。地震音菩薩。大海潮音菩薩。大雲雷音菩薩。法光音菩薩。虛空音菩薩。一切眾生廣大善根音菩薩。演昔大願音菩薩。降魔王眾音菩薩。寶覺菩薩。須彌覺菩薩。虛空覺菩薩。無垢覺菩薩。無著覺菩薩。廣大覺菩薩。開敷覺菩薩。普照三世覺菩薩。廣嚴覺菩薩。普觀覺菩薩。法界光明覺菩薩。

第二天冠下十位，一百一人，如次別表十地十度。一十冠者，初地檀行，冠於諸地，萬行首故。位各十者，一地具足諸地德故，一度具十為莊嚴故。二十髻者，表離垢地，持戒檢束，極尊高故。三十燄光，即發光地，發聞持光，照法忍故。四十聚者，積集道品智慧聚故。五十聲者，入俗化物，偏得聲名，經說三昧為雷聲故。六十出生者，般若現前，生諸德故。七十吉祥者，空中方便慧，有中殊勝行，為吉祥故。八十自在王者，不動大願，具十自在故。九十音者，善慧法師說力故。十有十一覺者，法雲受職墮佛數故，智度覺法無所遺故。欲顯差別，故

為此配，非可局執。

如是等上首菩薩摩訶薩。

第四如是等上首下，結數讚勝。讚勝者，皆上首故。前二上首，五千中上。今則五千，比餘皆上。言結數者，梵本具云五千人俱。

一切皆從普賢菩薩行願所生。所行無礙，普徧一切諸佛剎故。現身無量，親近一切諸如來故。離諸蓋障，如淨月輪，普現一切佛神變故。得現覺智，悉見諸佛所現自在神通境

故。得無量明，照一切佛大法教海智慧光故。具無礙解，以清淨辯，於無量劫說佛功德無窮盡故。住最勝智，猶若虛空，所行清淨無染著故。無所依止，隨諸眾生心之所樂現色身故。離諸翳障，了知眾生我人壽者皆非有故。智慧普遍，猶如虛空，以大光網照法界故。

第五一切皆從下，歎其勝德。有十一句。初總。餘別。總中普賢行願，即下十句及無盡德，略如釋題，廣如下經。然名隨別立，德無不具，云皆從生。以諸菩薩廣業崇德，並周法界齊諸佛故。第二所行無礙下，別中

十句。句各有二，上標，下釋，合為五對。即分為五。一窮依近正對。徧一切剎，方知無礙。近一切佛，始知身多。二離諸下，現通見用對。障蓋既離，方能現通。如淨月輪，光影方徧。現覺諸法，十眼圓明，始見如來無方大用。三得無量明下，內照外演對。照佛法海，方得多明。具四無礙，始能長演。四住最勝下，智淨色隨對。所行無著，始彰智淨。隨心能現，方顯無依。五離諸下，悲深智廣對。了眾生空，方離悲障。光網普照，始悟智周。前空取淨，此空取廣。

復與五百聲聞眾俱。

第二復與五百下，列聲聞眾。然聲聞一眾，八會皆無，獨此有者，為顯證法是不共故。在座不聞，方顯前八皆非其分故，故前不列。又約圓融，九會皆在。初成頓彰，無有前後。有聲聞者，九世相融，約法有耳。若不壞相，經有三節。初之五會，始成正覺，便頓說之。以初云始成，三天皆云不離菩提，帶前起故。第六七八，二七日說。別行十地，有二七故。七八重會，時必異故。第九一會，在於後時。由此故有諸聲聞等。佛初成道，未度五百，無逝多故。上之二解，一約圓融，二

約次第，二俱有理。如來一會能頓演故，圓融無妨。常恆之說不礙後故，次第何失。又無前後，依何同時。若無同時，何異餘教。非唯無礙，亦乃相成。文中分二。初標數類。依聲悟道故曰聲聞。以佛道聲，令一切聞，真聲聞也。

其諸聲聞有大威德。

二其諸聲聞下，歎其勝德。有十一句。初句總明。悉覺真諦下，別。然此聲聞，本是菩薩，欲顯深法，跡示聲聞。故所歎德，言含本跡。釋為二門。一就跡門，

皆聲聞德。一得現觀故，於四真諦善覺了故。二入正性離生，無方便慧故，皆證實際。三所學已窮，云深入法性。故法華云，我等同入法性。即三獸渡河，理無二故。古人亦將上三，如次配於見修無學。四生分已盡，由闕大悲故自出有海。五依佛威德，但謂如空。故法華云，一切諸法，皆悉空寂，無生無滅，無大無小，無漏無為，如是思惟，不生喜樂。六捨分段因，云離結使縛。九結十使，皆悉離故。七捨分段報，云不著依處。依處即是賴耶識體。今言不著，是捨離故。唯論說阿羅漢位捨賴耶故。而梵本云那阿賴耶。那即無義。無阿賴

耶，即是捨義。阿賴耶識名為執藏，即是種子所依處故，根本依故。因無我愛，果何由生。八心善解脫，故寂如虛空。九慧善解脫，故於佛無惑。十明非定性皆可迴心，故於佛智以信得入。二約本門，就菩薩歎。故如來不思議境界經云，復有無量百千億菩薩，現聲聞形，亦來會坐，其名曰，舍利弗，大目犍連等。廣如彼說，明皆是權。故下身子令海覺等觀文殊德。若實聲聞，不見不聞，何以能知文殊勝德。

悉覺真諦。皆證實際。深入法性。永出有海。依於如來虛空

境界。離結使縛。不著依處。其心寂靜，猶如虛空。於諸佛所，永斷疑惑。於佛智海，深信趣入。

十中，一覺真實義故，名善覺真諦。二已具方便，善能入於無際際故，名證實際。三二空真性窮真源故，方為深入。四具足大悲入有不染，是故方能永出有海。五依佛深境，量等虛空，亦如虛空無所依故。六不斷煩惱，亦不與俱，方能永離現行諸結隨眠諸使之所縛故。七八地已上，同於羅漢，捨賴耶故，不著依處。八處亂恆寂，了本性空，得無生忍，住如空性無障礙故，云其

心寂靜猶如虛空。九佛不共德，設未全證，亦知定得故，於諸佛所，永斷疑惑。十者一切智海，是證信入，方曰深故。總句隨別，亦有本跡。具斯二解，文理方周。故前諸譯，文皆兩含。羅摩伽經乃以真諦而為四諦。然四諦多種，亦通大小，而言多屬小，故非得意。

復與無量諸世主俱。

第三復與無量下，諸世主眾。亦分為二。先標數類。言無量者，一無量色類，二一一各有無量眷屬。

已曾供養無量諸佛。常勤利樂一切眾生。與諸眾生為不請友。常勤守護無歸向者。不捨世間，入殊勝智。從諸佛教境界而生。護持如來所有正法。起大誓願，不斷佛種。

二已曾下，歎其勝德。十句分二。前九歎自分。後一歎勝進，等佛智故。前中，前八成德。後一入位，生佛家故。前中四分。初一句歎福，二四句歎悲，三二句歎智，四一句歎願。今初可知。二常勤利樂一切眾生下，歎悲。此是總句。餘三是別。一無緣普應，故不待請，顯悲深故。二護念初心，偏救無歸，如於病者心偏

重故。三不捨世間，顯悲常故。入殊勝智，不滯空有。謂帶有觀空名方便智，依空涉有名殊勝行。則度而無度，故常不捨。亦無愛見，處而無厭。三從諸佛教境界而生下二句，歎智。此句總明。根本之智，依如來教，從真境生，無生生故。後得之智，亦從佛教，兼事境生。二智既生，則生菩薩。無有二智，非菩薩故。後護持句，別歎護法智。亦通二智。言所有正法者，謂教理行果。邪徒亂正，教法毀壞。立身護持，此即權智。心冥至理，理法則全，此是實智。修行趣果，是護行果，則通權實。護即守護，持謂任持。離佛世尊，更無正

法，故曰護持如來正法。四起大誓願不斷佛種，此句歎願。下佛種子於眾生田，願盡生界化化不斷故。上成德竟。

從行願力，生如來家。

後從行願力生如來家者，明其得位。生如來家，有其四位。一約菩提心家，初住發心即名為生，生解家故。二約聖教家，是第四住名生貴住，從於聖教而得生故。三約理家，初地證如，為得生故。四約無生忍家，八地已上，方為生故。今約行願為因，生家為果。義通

四種，正在後二。上自分竟。

專求如來一切智智。

二專求如來一切智智，歎勝進德。一切智者，根本智也。重言智者，後得智也。無餘趣向，故曰專求。上序分竟。

淨空法師專集網站(簡)製作